

QVÆSTIO MEDICA

CARDINALITIIS DISPUTATIONIBVS

MANE DISCVTIENDA

IN SCHOLIS MEDICORVM

die Iovis 8. Aprilis,

M. MARTINO AKAKIA,

DOCTORE MEDICO, PRÆSIDE.

An melancholicis meri potio salubris?

I.

EA est naturæ humanæ conditio, ut nulla ipsi constet securitas. Quæ illam ambiunt nunquam non insidiantur; quæ intus clausa gerit, cum eâ perpetuò confligunt. Inter tot insensos hostes præcariam hanc trahere animam necesse est, miserè quidem, & ad breve tempus, cum qui ipsam induit homo omnibus promiscuè utitur, prosperè verò, & ad multos annos, cum omnia ex legum medicarum præscripto agit, inprimisq; curam habet eorum quæ assumuntur, & maximè potûs, cujus ut longè major est quàm cibi necessitas, sic & vis multò superior. Et certè valetudinis studium à salubris potûs delectu sejungi non potest; ut is habeatur, non semper consuetudini obtemperandum est, nec audiendus quoq; appetitus, plerumque consueta non planè salutaria, & quæ grata sunt, frequenter subamicâ specie decipiunt, occultumque deleterium hostem gerunt: sed potûs & potantis natura invicem conferenda, seriò expendendum quid alterum valeat, alterum exigat;

Secùs nihil in hoc casu statui², aut statutum innoxie exhiberi potest.

I I.

MELANCHOLICORVM non unus ordo : Alios natura tales protulit, alios morbi, curæ, & vivendi lex tales exhibuit. Hi omnes squalidi, agrestes, mœsti, timidi, pauco, eoque debili calore perfusi, quorum ventriculus perpetuò appetit, hypochondria sunt suspensa & murmurantia, corpus totum uligine refertum, adeò ut ni undiquaq; eructaverit humida, ineluctabilis ipsi incumbat morbi necessitas : Humor venarum & arteriarum conceptaculis conclusus ad alendum ineptus quia asper, efferus, venenatus, nec potens regi à naturâ : Hinc illi macri, cardialgici, causarij, queruli, remediorum avidissimi : An ideò ipsis concedendus horum frequens usus? absit : exinde plus detrimenti quàm emolumenti. An fato suo relinquiendi? inhumanum prorsus: sed cibo & potu juvandi. Fœlix cui inter tot potuum genera, quæ aut natura protulit, aut ars adinvenit, contigit eo uti à quo sitis sedetur, coctio promoveatur, distributio juvetur, stomachus corroboretur, hypochondria non distendantur, sanguis edulcetur, uno verbo omnis excrementorum, præsertimque urinae excretio perficiatur.

I I I.

VINI certè magna vis est quâ ingenium acuit, major quàm morbos curat, maxima quàm sanitatem sartam, rectam servat. Tot & tanta modò ocyùs, modò tardius, modò strenuè, modò imbecillè, quâ datâ occasione, omnigenum vinum efficit. Commodissimè verò & nullâ naturæ adhibita vi quæ in Parisiorum finibus, Campaniâ, & Burgundiâ nata, annis præsertim benè constitutis, propriamque temperiem servantibus. Hæc quippe viscera foveat, non torrent, quemadmodum Hispanica: non fumos nobilissimæ mentis arci offundunt, ut Aureliana: Non serosis excrementis corpus onerant, ut quæ in frigidiore Briæ tractu succrescunt: non obstructions pariunt, nec melancholici succi copiam aggerunt, ut crassa & nigra quæ ex agro Burdigalensi huc advehuntur. Nec refert multum, an rubore læta fuerint, an

candore jucunda. Sat fuerit si decorâ & serenâ puritate ita reluceant, ut illa de rosis, hæc credantur nata esse de liliis. Optandum equidem tale lixivium vinum, quia præstantissimum: sed cum non suppetit, tortivum ejus loco substituitur, modò defæcatum & concoctâ acerbitate maturum.

I V.

N V B E M pro Iunone captat qui merum potens esse vinum credit, non purum. Meraca quædam sunt dilutis etiam multò inferiora, eoque solùm nomine exoptanda, quòd salubrem illam vini vim (quâ nihil ad totius corporis nutritionem uberius, ad corroborandum præsentius, ad spirituum generationem, eorumque diffusionem per totum corpus promovendam accommodatum magis, natura procreare poterat) illibatam contineant. Surrentini, Andrefiaci, Aïaci, Remensis, Belnensis, Divionensis meri, privilegium est benigno ac nobis familiari calore nativum nostrum augere: hominem ad actiones obeundas expeditiorem reddere: temperato vapore & naturæ amicissimo corpus totum perfundere, ad cuius præsentiam (non minùs quàm ad clavæ Herculis aspectum monstra) omnis dissipetur atra anathymiasis ab humore melancholico prodiens: hoc ut ventriculi imbecillitatem, & cruditatem ab humore frigido contractam sanat, sic syncopes quæ ab exhausto spiritu, aut à crudis succis os ventriculi laceffentibus profecta sit, præsentissimum est remedium: Et quod mirum, hypochondria non onerat, primas venas non offert: quoquo versum celeriter permeat, agendique finem non facit, quin potorem suum ab excrementorum tyrannide liberaverit, præsertimque largo urinæ profluvio beaverit.

V.

Q V A M salubre sit mero se proluere, cum urget potûs necessitas, noverunt suo commodo melancholici: statim atque huic vivendi legi se addicunt, continuò videas eos rubicundo floridòque faciei colore decoros: Ex vultuosis & tetricis hilares ac festivos: ex macris obæsos: ex aridis exuccis & exanguibus succosos, & æquabili succorum copia irriguos. Non jam ipsis marcescens calor, sed vegetus: non inter mortua altrix ferèque devicta, sed novis & audacioribus co-

piis recreata : non flatibus distenta hypochondria, sed æqualiter mollia, tactuque cedentia; & qui in aliis niger est & obsænus sanguis, in his proprio fulgore rutilat, & amabili luce splendescit : nulla in eo ampliùs acerbitas & austeritas, sed optanda omni ex parte dulcedo deprehenditur. Non horum quemquam audias de valetudine conquerentem : proventus & collectio uberior serosæ illuviei, unde infiniti penè morbi in dies scaturiebant, non ampliùs fit, quidquid aquei perfecta nutritione superest illud citò amandatur ad vesicam, adeo ut nihil melancholicis accommodatius vino possit exhiberi.

Ergo melancholicis meri potio salubris.

Proponebat Lutetiæ PETRVS LOMBARD, Æduensis Diœcesis,
A. R. S. H. M. DC. LXVI.

Ex Typographia FRANCISCI MUGVET, viâ Citharæ.